



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA  
JUDISIÁRIU

**Komunikadu Imprensa**  
**12 Marsu 2024**

**JSMP fahe informasaun kona-ba Asesu ba Justisa Formál ba iha  
Estrutura Aldeia no Komunitade iha Aldeia Tulaika, Suku Lifau, Oekusi**

Iha 21 Feveireiru 2024, JSMP realiza dezaminasaun informasaun kona-ba asesu ba iha justisa formál ba estrutura Aldeia no mós comunidade sira iha aldeia Tulaika, Suku Lifau Sub-Rejiaun Administrativu Pante-makasar, Rejiaun Administrativa Espesiál Oekusi-Ambeno (RAEOA) ba Programa Apoiu Seguransa Komunitáriu (PASK).

Objetivu hosi dezaminasaun informasaun ne'e mak atu hasa'e koñesimentu estrutura aldeia no comunidade sira-nian kona-ba oinsá asesu ba justisa formál no asegura rezolve kazu disputa sira no seluk tan iha aldeia ho baze tuir lei formál sira ne'ebé vigora ona.

Materia iha treinamentu ne'e kompostu hosi definisaun kona-ba lei, definisaun krime, tipu krime, natureza krime, ho ninia pena no mós prosedimentu ba iha kazu krime no sivíl iha prosesu justisa formál. Alende ne'e esplika mós kona-ba papél estrutura aldeia sira bainhira akontese disputa ruma iha aldeia. Iha ikus, ekipa JSMP mós fahe kona-ba serbisu rede referral nian iha assisténsia legál ba vítima feto no labarik.

“JSMP kontenti bele realiza treinamentu ne'e ba autoridade lokál iha nivel aldeia no comunidade sira iha aldeia Tulaika, nune'e bele hasa'e comunidade sira nia koñesimentu kona-ba prosesu justisa formál. Atividade ida ne'e mós hanesan parte ida hosi akordu Nota Entendimentu (MoU) entre Suku Lifau ho JSMP iha Programa Apoiu Seguransa komunitáriu (PASK) hodi responde ba iha preokupasaun ne'ebé xefe aldeia no comunidade sira hato'o durante serbisu hamutuk ho JSMP durante tinan ida liuba,” dehan Sra. Ana Paula Marçal, Diretora Ezekutiva JSMP.

Depoisde rona tiha apresentasaun matéria hosi JSMP, comunidade sira iha preokupasaun kona-ba implementasaun Lei Kontra Violénsia Doméstika (LKVD) ne'ebé mak autoriza ema seluk bele hato'o keixa bainhira mosu kazu baku malu entre feen ho la'en maski hanesan bikan kanuru mak tarutu ka baku oan sira ho objetivu atu hanorin. Hatan ba ida ne'e, JSMP hateten situasaun ne'e depoisde kuandu iha ona LKVD, kualkér krime ne'ebé envolve feen ho la'en, eis feen ho eis la'en ka ho ema seluk ne'ebé hela hamutuk iha uma laran bainhira iha dependénsia ekonómia, inan-aman balu oan automatikamente konsidera hanesan krime públiku, nune'e ema se de'it bainhira hatene ka rona bele hato'o keixa ba polísia ka ministériu públiku no nia prosesu to'o tribunál mak foin bele hotu.

Iha parte seluk, partisipante sira mós husu kona-ba tanbasa labarik sira iha idade ki'ik gosta malu inan-aman konkorda ona sira harii uma-kain, maibé to'o

ikus kous oan ida ka rua, mane ne'e decide abandona hela fetu ho labarik, ida ne'e lei fó dalan atu nia iha obrigasaun atu filafali ba nia feen ho oan ka lei fó dalan atu nia bele kaben tan ho fetu seluk tuir nia hakarak. Hatan ba preokupasaun ida ne'e, JSMP esplika katak bainhira fetu ho mane harii ona família, maibé nia senti moris ne'e la feliz tanba razaun sira ne'ebé bele justifika tuir Lei Penál no Sivil katak sira labele ona hamutuk hanesan família tantu ne'e hosi parte mane ka fetu durante sira moris hamutuk no ida ne'e, sira ida-idak bele decide hapara sira nia relasaun moris hanesan feen ho la'en. Maibé mós tuir lei sei nafatin obriga sira na'in rua atu responsabiliza ba labarik sira ne'ebé sira rua tau ona.

Entretantu preokupasaun seluk maka kona-ba oinsa ho kazu baku malu ne'ebé nia prosesu to'o tiha ona tribunál mak foin suspeitu buka vítima atu dame malu no konsege hetan solusaun dame, no lori karta akordu dame hosi aldeia ka suku ba dada fali prosesu ne'e, ida ne'e ka lae. Hatan ba ida ne'e, JSMP esplika katak ba kazu hotu-hotu ho natureza semi públiku bainhira iha ona karta akordu dame hosi parte rua no bele apresenta ba iha tribunál hodi bele dada fali prosesu kazu refere. Tanba prosesu sira ho natureza semi públiku bainhira to'o iha tribunál mós sei nafatin kontinua halo tentativa konsiliaasaun ba dala ikus nian no karik parte sira hakarak dame malu de'it no prosesu sei taka de'it ka babain temi omologa ba pedidu dezisténsia keixa maibé karik parte ida hosi vítima ka arguidu mak la aseita atu dame malu no nia prosesu sei kontinua ba oin ho tipu julgamentu.

Xefe aldeia no membru comunidade sira ne'ebe partisipa iha treinamentu ne'e hato'o katak dezaminasaun informasaun sira hanesan ne'e importante no di'ak ba estrutura aldeia no ba membru komunidadada sira atu hetene tanba dala barak dezaminasaun informasaun sira hanesan ne'e la to'o iha aldeia, nune'e difikulta estrutura aldeia sira atu rezolve tuir prosedimentu lei formál sira tanba ne'e sira konsidera informasaun ne'e bele tulun ona sira hodi hatene oinsá rezolve sira nia kazu iha justisa komunitáriu no oinsá bele lori kazu prosesu ba iha justisa formál.

Partisipante ne'ebé partisipa iha deseminasaun informasaun ne'e hamutuk ema na'in 19 ne'ebé kompostu hosi fetu na'in 7 no mane na'in 12. Partisipante sira mak hanesan xefe suku Lifau, OPS suku, xefe aldeia Tulaika, lia na'in aldeia na'in 1, lia-na'in uma lisan na'in 1, xefe joventude Tulaika na'in 1, delegadu/a na'in 2, LGTBIQ+ na'in 1, defisiénsia 2 no mós comunidade balun.

Atividade treinamentu ne'e realiza hosi JSMP liuhosi Programa Apoiou Seguransa Komunitariu (PASK), tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelandia.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

Atu hetan informasaun liutan favor kontaktu:

Ana Paula Marcal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)